



**Francisci De Fargna Civitatis Plebis Patrii Philosophiæ,
Sacræ Theologiæ, ac J. U. Doctoris ... Commentaria In
singulos Canones De Jurepatronatus**

Qui sparsim tam intrà, quàm extra corpus Juris Canonici vagantur ...

**Fargna, Francesco de
Montisfalisci, M.DCC.XVII.**

Casus X. Argumentum. Ad validam præsentationem personæ ad dignitates in Cathedralibus, aut Collegiatis, quid requiritur? Et de requisitis in promovendo ad hujusmodi dignitates.

[urn:nbn:de:hbz:466:1-72191](https://nbn-resolving.org/urn:nbn:de:hbz:466:1-72191)

ab intest. venien. collat. 9. cap. 1. §. Hoc autem de his, qui feud. dar. poss. Bellon. de Jure accresc. cap. 5. quest. 26. num. 66.

6 Sed debet æstimari ex prioritate, & posterioritate juxta *Bellon.* & alios apud eum ubi supra, quòd scilicet Bartholomæus per prius dilexerit suos hæredes, & per posterius hæredes sui Fratris, quòd cum hoc in Casu presenti non verificetur, cum Bartholomæus, quoad successionem Juris præsentandi non distinxit suos hæredes ab hæredibus Colellæ, sed omnes conjunctim vocavit, certi Juris est, si ex his unus deficiat, regulariter inter alios nullam considerari posse prælationem, ut in dicta *L. Unica his ita definitis, vers. In his itaque Cod. de Cad. toll. Bartol. in L. Re conjuncti num. 30.* & alii apud *Bellon. dicto cap. 5. quest. 45.*

Supradicta decisio Rotæ non applicatur, quia ibi non agitur de eodem modo, re, & verbo conjunctis, ut in casu præsentis, sed de diverso modo conjunctis, cum Camillus, & Philippus in eadem oratione, in qua etiam comprehensi fuerunt Bonfilii, & ejus descendentes, speciali copula fuerunt conjuncti, & uniti, ut ibi dicitur num. 8. Unde mirum non est si decedente Camillo absque descendentibus, jus illius augetur Philippo, & non Bonfilio, & ejus descendentibus.

7 His itaque veteris existentibus manifestè sequitur, quòd Reverendissimus Cantor de Schipano instituendus sit in dicta Cappella Sanctæ Crucis, utpote præsentatus ab habentibus majorem partem vocum, nempe ab Aloysio, Clara, & Theresia Descendentibus à Colella, & habentibus integram medietatem vocum, & duas quartas, seu portiones partis medietatis vocum spectantis ad hæredes Bartholomæi descendentes à Camillo ejus filio ad *Text. in cap. Quoniam de Jurepatron. Zecch. de Benefic. & pension. cap. 12. nu. 35. Lambert. de Jurepatr. lib. 2. par. 3. quest. 4. art. 1. 4. & 6. & alii apud Vivian. par. 2. lib. 12. cap. 8.* Non autem Bartholomæus utpote præsentatus ab habentibus minorem partem vocum, nempe à Matthæo, Isabella, & Theresia hæredibus Bartholomæi, Descendentibus à Marco Antonio ejus filio, habentibus solam unam par-

tem medietatis vocum, & unam quartam dictæ partis dictorum hæredum; Licet dictus Bartholomæus sit consanguineus Bartholomæo Seniori, & Renovatori dictæ Foundationis, quia Consanguineus solum in paritate, & non in disparitate vocum est præferendus extraneo, juxta *Rotam in Mediolanen. Jurispatr. coram Paulatio impressa apud meum Advocatum Pitonium Discept. Eccles. 28. num. 8. & in Placentina Parochialis 16. Martii 1708. S. finali coram R. P. D. Anfaldo.*

ARGUMENTUM.

Ad validam præsentationem Personæ ad Dignitates in Cathedralibus, aut Collegiatis quid requiritur? Et de requisitis in Promovendo ad hujusmodi Dignitates.

SUMMARIUM.

- 1 Promovendus ad Dignitates, quibus inest Cura Animarum, qua requisita habere debeat? Et que requirantur in promovendo ad Dignitates, quibus non inest Cura Animarum?
- 2 Dignitas Diaconalis, Archidiaconalis, & Ecclesia Parochialis habent annexam Curam Animarum.
- 3 Promovendus ad Dignitatem habentem annexam Curam Animarum debet habere vigesimum quintum annum inceptum, licet non completum, aliàs collatio est ipso Jure nulla. Amplia, ut num. 4. Limita ut num. 5.
- 6 Episcopus non potest dispensare super etate promovendum ad Dignitates curatas, sed solus Papa super ea dispensat.
- 7 Dispensatio circa defectum etatis pro obtinendo Sacerdotio, an suffragetur pro obtinenda Dignitate habente annexam curam Animarum in Cathedrali, aut Collegiata?
- 8 Etas 25. annorum, à quo tempore sit computanda?
- 9 Etas non incipit in utero Matris, sed in Partu.
- 10 Promovendus ad Dignitates curatas, à

- à quo tempore habere debeat ordinem Sacerdotalem?
- 11 Non promotus ad ordinem, quem Beneficium requirit, non est ipso Iure absque monitione Beneficio privatus, sed limita in Ecclesiis Parochialibus.
- 12 Rector Ecclesie Parochialis non promotus intra annum ad Sacerdotium, ut privari possit dicta Ecclesia, qua requirantur?
- 13 Rector Ecclesie Parochialis, si infra annum non fecit se promoveri ad Sacerdotium, an licite possit retinere fructus Ecclesie, quos percepit durante anno?
- 14 Annus, infra quem Promotus ad Ecclesiam Parochialem promoveri debet ad Sacerdotium, à quo tempore sit annumerandus.
- 15 Etas requisita ad Dignitates non curatas obtinendas juxta Tridentinum est vigesimus secundus annus completus, amplia, ut ibi.
- 16 Dictio Præsertim est implicativa.
- 17 Etas 22. annorum requisita ad Dignitates non curatas, an sufficiat, si dicta Dignitates habeant annexum ordinem Presbyteratus?
- 18 Patronus presentare debet ad Dignitates curatas, & non curatas Personas habentes omnia requisita ad illas obtinendas.
- 19 Patronus si presentaret personam non habentem sufficientem etatem ad Dignitatem curatam, aut non curatam, an hujusmodi presentatio esset valida?
- 20 Presentatus, & provisus de Beneficiis curatis, aut de Canonicatibus intra duos menses emitte debet Professionem Fidei, & coram quo? Amplia, ut num. 21. 22. & 23. limita, ut n. 24. 25. 26.
- 27 Professio Fidei Sede Episcopali vacante, coram quo fieri debeat ab obtinente Canonicatum, aut Beneficium curatum?
- 28 Non emittens Professionem Fidei intra duos menses, quos fructus amittat?
- 29 Non emittens Professionem Fidei intra duos menses, ne perdat fructus sui Beneficii, quid facere debeat?
- 30 Professio facta post duos menses non

prodest ad querendos fructus temporis præteriti.

C A S U S X.

VAcante Præpositura, aut Archipresbyteratu, aut Diaconatu, aut Archidiaconatu, aut alia Dignitate de Iure patronatus, ad hoc ut Patronus possit ad dictas Dignitates valide presentare, hic necessarium duxi querere quid requiratur.

Pro resolutione hujus quæstionis præsupponendum est, quod promovendus ad Dignitates, Personatus, aut alia Beneficia, quibus inest Cura Animarum, debet habere etatem saltem viginti quinque annorum, ordinem, integritatem morum, & doctrinam ad suum munus exercendum necessariam; etsi Dignitas, ad quam promoveretur sit Archidiaconatus, ultra prædicta debet esse Magister in Theologia, aut Doctor, aut licentiatu in Iure Canonico; promovendus verò ad Dignitates, & Personatus, quibus non inest Cura Animarum, sufficit, quod habeat etatem non minorem viginti quinque annis, & ordinem Clericalem juxta Text. in cap. Cum in cunctis S. Inferiora de Electione, ibique Abbas, Anan. Bald. num. 2. Butrius num. 1. & 3. Fagnan. num. 31. & juxta Concil. Trident. sess. 24. de Reformat. cap. 12.

Et quidem promovendus ad Dignitates habentes annexam Curam Animarum, ut sunt Dignitas Diaconalis, Archidiaconalis, & Ecclesia Parochialis, juxta Butr. in dicto cap. Cum in cunctis in princip. ibique Fagnan. num. 31. necessarium tempore collationis debet habere vigesimum quintum annum, qui tamen sufficit, quod sit inceptus, licet non completus, aliàs collatio est ipso Iure nulla, Text. in cap. Licet Canon. de elect. in 6. ibique gloss. verb. Licet, Abb. in dicto cap. Cum in cunctis num. 1. Quod procedit, si cura incumbens Dignitati sit fori Penitentialis, siue jurisdictionalis Fagnan. dicto cap. Cum in cunctis num. 32. Limitatur tamen in eo, qui promoveretur ad hujusmodi Dignitates cum dispensatione circa defectum etatis; potest namque quis cum dispensatione promoveri ad

Di.

Dignitates, & Personatus in Cathedralibus, quibus est annexa Cura Animarum in minori ætate *Glossa in dicto cap. Cum in Cunctis verb. Artigerit*. Quam dispensationem non potest concedere Episcopus, nam *Text. in cap. Unico de atat. & qualit. lib. 6.* permittit Episcopo dispensationem in Dignitatibus, & Personatibus non curatis, ergo secus in Curatis; sed solus Papa, qui potest dispensare cum Minore 25. annis, vel expressè, vel tacitè, conferendo sciens, & volens ei Dignitatem in Cathedrali habentem Curam Animarum *Abb. in dicto cap. Cum in Cunctis §. Inferiora de elect. num. 7. ibique Anan. numero 5.*

Sed si Papa dispense, ut habens 20. annos possit se promoveri ad Sacerdotium, quæritur, an hujusmodi dispensatio circa defectum ætatis pro obtinendo Sacerdotio suffragetur pro obtinenda Dignitate habente annexam Curam Animarum in Cathedrali, aut Collegiata? Respondeo negativè, quia habilitatus ad unum non est habilitatus ad aliud. *Anan. in dicto cap. Cum in Cunctis, num. 3.*

A quo autem tempore ætas 25. annorum sit computanda, an scilicet Conceptionis, an Nativitatis, vel Baptismi? Responderetur esse computanda à die Nativitatis, dum ætas nihil aliud est, quam temporis mensura quædam à Nativitate usque ad obitum decurrens, juxta *Bald. conf. 19. sub num. 3. lib. 5.* & non esse computandam à die Conceptionis, dum ætas non incipit in utero Matris, sed in Partu, nec à die Baptismi, ut resolvit Sacra Congregatio Concilii, teste *Fagnano in dicto cap. Cum in cunctis num. 133. & seqq.*

Præter ætatem 25. annorum requiritur in promovendo ad Dignitates, & Personatus, quibus est annexa Cura Animarum, ordo Sacerdotalis. Quæritur à quo tempore promovendus illum habere debeat?

Responderetur non esse necessarium, quòd habeat ordinem Sacerdotalem de tempore Promotionis, sed satis esse, quòd postmodum promoveatur in proximis temporibus. Ratio est, quia annexio ordinis Sacerdotalis, quam habent Dignitates, & Beneficia curata est de Jure communi respectu aptitudinis, quia debet esse aptus ad illum ordinem, non verò est respectu

actus; sed si dicta annexio ex speciali statuto, aut dispositione sit respectu actus, scilicet si detur aliquod statutum, aut dispositio, quòd non conferatur Beneficium curatum, nisi actualiter constituto in Sacerdotio, tunc requiritur, quòd promovendus habeat dictum ordinem de tempore Promotionis *Abbas in dicto cap. Cum in Cunctis, ubi supra num. 1. & 10. in fine, ibique Anan. ante num. 1. Batrius num. 4. & 5.*

Sed si non facit se promoveri ad ordinem, quem Beneficium requirit, non est ipso Jure Beneficio privatus, nec debet privari sine monitione. Quòd tamen limitatur in Ecclesiis Parochialibus non Collegiatis, ubi incontinenti est privatus absque ulla monitione, qui non facit se intra annum promoveri in Sacerdotem. *Text. in cap. Licet Canon. de Elect. in 6. Abb. in dicto cap. Cum in Cunctis num. 2. ibique Butr. num. 6.*

Et hic nota, quòd ad hoc ut Rector Ecclesiæ Parochialis non promotus intra annum ad Sacerdotium, privari possit dicta Ecclesia, requiritur, quòd annus integer sit completus, sed iste annus non currit justè impedito, scilicet vel propter Infirmiorem, vel propter absentiam proprii Episcopi, vel eo quia non potuit habere Commendatitias, vel eo quia Episcopus noluit eum ordinare, hæ enim sunt justæ Causæ, quæ eum excusabunt *Text. in cap. Commissa de elect. in 6. ibique Gloss. Verbo justo impedimento*. Requiritur etiam ipsum citari, & facere pronunciari illum privatum, nam si hoc omissio fiat collatio, ipse postea veniens, & de justo impedimento, vel dispensatione fidem faciens, collationem cassari faciet. *Gloss. ubi supra.*

Sed si Rector Ecclesiæ Parochialis infra annum non fecit se promoveri ad Sacerdotium, utrum licitè possit retinere fructus Ecclesiæ, quos percepit durante anno? Responderetur, quòd iste, si in principio, quando fuit institutus, non habebat intentionem, ut promoveretur ad Sacerdotium infra annum, sed solum ut perciperet fructus, tunc tenetur ad restitutionem fructuum, si verò habebat intentionem se promovendi ad Sacerdotium infra annum, sed ex aliqua causa superveniente non

non vult promoveri, quia fortè ejus frater antiquior vult promoveri, & ipse vult remanere in seculo, non tenetur ad restitutionem fructuum *Gloss. 1. in dicto cap. Commissa, vide Barbofa ad Concil. hic numer. 41.*

A quo autem tempore annus, infra quem Promotus ad Ecclesiam Parochialem promoveri debet ad Sacerdotium, annumerandus sit? Dico annumerandum esse à tempore adeptæ pacificæ possessionis, vel à tempore, quo potuit habere pacificam possessionem, & per se sterit juxta *Text. in cap. Cum ex eo de elect. in 6. ibique Gloss.*

Respectu verò Dignitatum, aut Personatum, quibus nulla Cura imminet de Jure communi non invenitur expressè cautum, qua ætate debeat esse is, qui promovetur ad Dignitatem Curam Animarum non habentem juxta *Innocent. in cap. Præterea sub num. 1. de atate, & qualitate*; Ideò Concilium Tridentinum in dicta sess. 24. de Reformat. cap. 12. respectu hujusmodi Dignitatum requirit ætatem annorum 22. & quidem, quòd vigesimus secundus annus sit completus, ut asserit *Fagnan. in cap. Cum in Cunctis de election. num. 37.* fuisse resolutum à Sacra Congregatione Concilii. Quod procedit, siue sint Dignitates Sæculares, siue Regulares, siue sint in Ecclesiis Cathedralibus, siue in Collegiatis: quia Concilium in dicto cap. In 8. Ad cæteras disponit de Dignitatibus tam in Ecclesiis Cathedralibus, quàm Collegiatis, ut patet tum ex initio illius decreti, ibi: *Cum Dignitates in Ecclesiis præsertim Cathedralibus*: Dicitio enim *Præsertim* cum sit implicativa, utique implicat idem in Collegiatis, easque includit tum ponderando dictionem universalem quascumque, & ad cæteras *Fagnan. in dicto cap. Cum in Cunctis num. 112. & 48.*

Sed si hujusmodi Dignitates non habentes annexam Curam Animarum, habeant annexum ordinem Presbyteratus, an respectu harum sufficiat ætas 22. annorum. Distinguendum est. Aut habent ordinem Presbyteratus annexum ex Privilegio, Fundatione, Statuto, vel consuetudine, & tunc ad eas obtinendas non sufficit ætas 22. annorum, sed oportet, ut provisus sit

in tali ætate, ut infra annum possit in Presbyterum ordinari, & sic in 24. inchoato. Aut habent ordinem Presbyteratus annexum de Jure communi, ut sunt Præpositura, Diaconatus, & Abbatia, & tunc sufficit ætas 22. annorum, & quòd obtinens illas se promoveat in proximis temporibus ad Presbyteratum. *Fagnan. in dicto cap. Cum in Cunctis num. 43.*

18 His præsuppositis; Patronus, ut ritè, & validè procedat, præsentare debet ad Dignitates habentes annexam Curam Animarum Personam habentem ætatem 25. anni saltem incæpti, & Ordinem Sacerdotalem, vel de tempore præsentationis; Si ordo Sacerdotalis sit annexus dictis Dignitatibus ex speciali Statuto, aut dispositione Fundatoris, vel satis est, quòd præsentet Personam, quæ postmodum promoveatur in proximis temporibus, si ordo Sacerdotalis sit annexus tantum de Jure communi. Respectu verò Dignitatum, quibus non est annexa Cura Animarum, nec ordo Sacerdotalis ex speciali Statuto, & dispositione Fundatoris; Præsentare debet Personam habentem 22. annum completum; Sed si ordo Sacerdotalis sit annexus hujusmodi Dignitatibus ex speciali dispositione Fundatoris debet præsentare Personam in tali ætate, ut infra annum possit in Presbyterum ordinari, & sic in 24. inchoato.

Sed si præsentaret Personam non habentem sufficientem ætatem ad dictas Dignitates, an hujusmodi præsentatio esset valida? Respondeo cum distinctione, aut Patronus præsentat scienter istam Personam non idoneam, & inhabilem, absolute, & tunc præsentatio ista est nulla, nullumque habere potest effectum, aut præsentat conditionatè, scilicet sub spe habilitatis, aut dispensationis, ut licitum est fieri, juxta *Card. de Luca de Jurepat. disc. 45. num. 7. & disc. 64. num. 27.* & alios relatores infra in cap. *Quoniam Cas. num.* Et in hoc Casu superveniente habilitate, & obtenta dispensatione inhabilitatis intra quadrimestre, aut semestre præsentatio sic facta est valida. Et non obtenta dispensatione, potest Patronus alium præsentare intra eundem terminum.

20 Præsentatus autem, & provisus de Beneficiis Curatis, & de Canonicatibus, & Di-

Dignitatibus in Cathedralibus ad minus intra duos menses à die adeptæ possessionis debet emittere Professionem Fidei, cum hac distinctione, quòd Provisus de Beneficiis curatis extra Cathedralē debet emittere Professionem Fidei coram Episcopo, aut ejus Vicario Generali; Provisus verò de eisdem Beneficiis in Cathedrali non solum debet emittere coram Episcopo, aut ejus Vicario, sed etiam coram Capitulo sub poena ammissionis fructuum juxta Constitutionem Pii IV. incipien. *Injunctum* in ordine la 114. & ex *Tridentino dicta sess. 24. cap. 12.* quam sequuntur. *Garz. de Benefic. par. 3. cap. 3. num. 1. Tamburin. de Jure, Abb. disp. 8. quest. 3. tom. 1. num. 1.*

21 Quod ampliatur primò. Provisus de Beneficio curato, aut de Canonicatu, aut Dignitate in Cathedrali potest emittere hujus professionem Fidei non solum per se ipsum, sed etiam per Procuratorem. *Navarr. cons. 4. num. 2. de Summ. Trinit. Barbosa. de Offic. & Potest. Paroch. cap. 4. num. 3.* Ratio est quia, neque Concilium Tridentinum, neque Constitutio Pii IV. utuntur verbis significantibus personalitatem, & propterea succedit regula; quicumque potest aliquid facere per semetipsum, potest illud facere per Procuratorem, juxta *Text. in cap. Potest quis de reg. Jur. in 6. Tamburin. de Jur. Abbat. disput. 8. quest. 3. num. 12. tom. 1.*

Ampliatur secundò. Tenetur emittere 22 professionem Fidei, etiam si illam semel emisit in adeptione similis Parochialis, aut Canonicatus juxta resolutionem Sacre Congregationis, quam refert *Garz. de Benefic. par. 3. cap. 3. num. 17. Tamburin. de Jure, Abbat. disput. 8. quest. 3. num. 8. tomo 1.*

23 Ampliatur tertio. Provisus de Beneficio curato potest emittere hujusmodi professionem Fidei coram Vicario, etiam Episcopo non impedito *Garz. ubi supra n. 23. Barbosa. de Offic. & Potest. Paroch. part. 1. cap. 4. num. 2.*

Limitatur tamen propositio supradicta 24 primò; In Proviso de Cura Animarum habituali, qui non tenetur emittere professionem Fidei, quia de illa judicatur perinde ac si esset beneficium simplex *Barbosa. ubi supra num. 9.*

Pars I.

25 Limitatur secundò in Canonicis, seu Dignitatibus in Ecclesiis Collegiatis, qui non tenentur emittere professionem Fidei, nam Concilium solum loquitur de Provisis de Canonicatibus, & Dignitatibus in Ecclesiis Cathedralibus tam Secularibus, quam Regularibus, & de Beneficiis Curatis, ut à Sacra Congregatione refert decisum *Garz. ubi supra num. 11.* Unde Provisi de portionibus, Cappellaniis, & Beneficiis inferioribus in Cathedralibus non tenentur emittere professionem Fidei *Garz. ubi supra num. 12. Barbosa. ad Concil. dicto cap. 12. sess. 24. num. 25.*

Limitatur tertio in Coadiutoribus Canonico- 26 rorum, seu Dignitatum etiam perpetuis, & cum futura successione, qui non tenentur ad prædictam professionem Fidei, nisi cum factus fuerit locus successioni, nam non sunt verè Canonici, seu Dignitates, nec pro talibus habendi viventibus coadiutis *Garz. de Benefic. dicta part. 3. cap. 3. num. 16.*

Positis his ampliacionibus, & Limita- 27 tionibus, Quæritur primò. Sede Episcopali vacante, coram quo fieri debeat dicta Professio Fidei? Et respondetur fieri debere coram Vicario Capitulari, quia cum jurisdictio Episcopalis administratur per Vicarium, magis per eum representatur Episcopus, quam per Capitulum *Garz. ubi supra num. 27.*

Quæritur secundò. Non emittens pro- 28 fessionem Fidei intra duos menses, quos fructus ammittat? Respondetur ammittere fructus postea decurrendos, non verò fructus decursos illis duobus mensibus *Barbosa. ad Concil. ubi supra num. 32. Garz. de Benefic. dicta par. 3. cap. 3. num. 31.* Et licet ammittat fructus postea decursos, non tamen ammittit distributiones, quia istæ dantur ratione Ministerii, & servitii Personalis, *Barbosa ubi supra num. 36.* Et ita censuit Sacra Congregatio Concilii teste *Gonzal. super regul. 8. Cancell. S. 7. proam. num. 170.* quamvis contrarium sentiat *Rota decis. 157. numer. 1. tom. 2. Recent. ubi dicit, quòd ante emissam professionem, juxta formam Concilii Tridentini fructus, & distributiones non debentur Canonico.*

29 Provisus verò de Beneficio curato, aut Canonicatu, & Dignitate in Cathedrali,

A a

qui

qui non est professus intra duos menses ab adepta possessione, ne perdat fructus sui Beneficii, potest, & debet facere illam professionem post præfatos duos menses. Tum quia, qui jubetur facere aliquid intra certum tempus, videtur obligari ad duo, videlicet ad faciendum illud intra illud tempus si potest; & ad faciendum illud post lapsum temporis præstituti, quàm citè commodè facere poterit, etiam si non potuit illud antea facere. Hujusmodi professio facta post præfatos duos menses non prodest ad quærendos fructus temporis futuri, quia regulariter semel ipso Jure perditæ, non quærentur ipso Jure, quamvis æquitate posset juvari, qui per ignorantiam, incogitantiam, vel negligentiam Procuratoris id non fecit, qui tamen libenter fecisset, si fuisset monitus, vel venisset in mentem. *Navar. ubi supra num. 1. & 3. Barbof. ad Concil. ubi supra num. 22. Tamburin. de Jur. Abb. disput. 8. quest. 3. num. 9.*

ARGUMENTUM.

An Patronus possit præsentare ad Beneficium vacans cum, qui est Irregularis ex homicidio. Et varia de Irregularitate hîc pertractantur.

SUMMARIUM.

- 1 Irregularitas quid sit?
- 2 Homicida non potest promoveri ad Sacros Ordines, nec Beneficia Ecclesiastica obtinere?
- 3 Committens homicidium voluntarium incurrit Irregularitatem. Amplia ut num. 4. 5. 6. Limita, ut num. 9. 10.
- 7 Consulens, ut quis morti se exponat pro honore Christi, aut pro fide non est Irregularis.
- 8 Inquisitores hæretica pravitatis pronunciantes aliquem hæreticum morti tradendum, non sunt Irregulares.
- 11 Irregularitas proveniens ex homicidio voluntario, an sit de Jure Divinè?

- 12 Committens homicidium casuale est Irregularis, sed declara, ut num. 13.
- 14 Facienti actum permissum non imputatur id, quod sequitur ex illo.
- 15 Medicus faciendo licitè suum officium, si agrotus moriatur, non incurrit Irregularitatem.
- 16 Qui fecit fenestram in Domo, de qua aliquis spontè se præcipitavit, non est Irregularis.
- 17 Qui dant operam rei licite, ex qua casu sequatur homicidium, non sunt Irregulares, & numer. 18. usque ad 21.
- 22 Committens casu homicidium, si dabit operam rei licite, sed non adhibuit diligentiam, quam debuit, est Irregularis.
- 23 Committens casu homicidium, si dabit operam rei illicitæ, est Irregularis, sed limita ut num. 24. & 25. & 57.
- 26 Qui dant operam rei illicitæ, ex qua casu sequatur homicidium, an sint Irregulares? & num. 28. 29. 30. 33. 34. usque ad 37.
- 27 Irregularitas ex sola voluntate non contrahitur.
- 31 In dubio facti homicidii censendus est quis Irregularis.
- 32 Infamia delicti, etiam non data culpa facit quem Irregularem.
- Committens homicidium ex necessitate, aut defensione propria Persona est Irregularis. Amplia ut num. 39. limita ut num. 40.
- 41 Patronus si præsentet Irregularem scienter, & absolutè ad Beneficium Ecclesiasticum præsentatio est nulla, secus si eum præsentet conditionatè.
- 42 Patronus potest præsentare ad Beneficium merè laicale, aut Legatum Pium, Irregularem.
- 43 Irregularitati provenienti ex homicidio voluntario non solet dispensari, provenienti ex homicidio casuali solet dispensari, sed cum maxima difficultate, ut num. 44. provenienti verò ex necessitate inevitabili, solet facilè dispensari, ut num. 45. & num. 63. & 64.
- 46 Ladens supercilium oculi an sit Irregularis? & num. 47.

48 Irre-